

ՈՒՐԱՐՏԱԿԱՆ ԶՐԱՆՑՔԱՇԻՆՈՒԹՅՈՒՆԸ ՄԱՆԱԶԿԵՐՏԻ ՇՐՋԱՆՈՒՄ

Վ. Ա. ԳԱՅՍԵՐՅԱՆ

Ըստ սեպագիր արձանագրությունների, ուրարտական առաջին թագավորը, որը զբաղվել է ջրանցքների կառուցումով, Մինուան է (մ. թ. ա. 810—786 թթ.):

Մինուան, որ երկրի կենտրոնական շրջաններում հսկայական ջրանցքաշինական աշխատանք էր կատարել, ոռոգելի դարձնելով գրեթե ամբողջ վանալճի ավազանը¹, ձեռնամուխ է լինում նաև Արածանի գետի վերին հոսանքների տնտեսության զարգացմանը: Այս մասին են վկայում Մանազկերտի շրջանից գտնված հինգ սեպագիր արձանագրությունները²:

Մինուան կառուցում է նախ ռազմական խոշոր կենտրոն, որի մասին Մանազկերտից գտնված արձանագրության մեջ ասվում է. «հալդյան զորութամբ, հալղե տիրոջն իր Մինուա Իշպուինորդին այս տաճարը կառուցեց հուակապ, ամրոց կառուցեց...»³: Կառուցելով ամրոցը, որը պետք է ռազմական կարևոր հենակետ դառնար այդ շրջանների անվտանգությունը ապահովելու համար, այնուհետև Մինուան ձեռնամուխ է լինում տեղի տնտեսության զարգացմանը: Այդ նպատակով ոռոգելի են դարձվում շրջակա տարածությունները, որի մասին են վկայում երեք արձանագրություններ: Երկուսը գտնվել են Մանազկերտից հարավ-արևմուտք՝ Ադա և Խոտանլու գյուղերից, իսկ մեկը՝ հյուսիս-արևելքում գտնվող Մարմոս գյուղից⁴:

Ադայի արձանագրության մեջ ասվում է. «հալդյան զորութամբ Մինուա Իշպուինորդին այս ջրանցքը անցկացրեց. Մինուայի ջրանցք (է) անունը: Կտրեցի մինչև Մինուայի դաշտը, մինչև Ուլիշ[...]ինն քաղաքը, մինչև [...] քաղաքը...»⁵:

Խոտանլուի արձանագրության մեջ ասվում է. «(Մի) ջրանցք Մենեղայալից անցկացրի: Մինուայի ջրանցք (է) անունը...»⁶: Այնուհետև արձանագրության մեջ նշվում է, որ ջրանցքը շենացրեց Ուկուա, Զուգուխե, Իրնունե, Աբասև քաղաքներն իրենց շրջաններով⁷:

Ըստ ընդունված տեսակետի վերահիշյալ ջրանցքները առանձին ջրանցքներ են⁸ և անց են կացվել Դահնալա (Արածանի) գետի՝ Մանազկերտից հա-

¹ Г. А. Меликишвили, Урартские клинообразные надписи, М., 1960 (այսուհետև՝ УКН), №№ 43—56, 57, 58, 62:

² Նույն տեղում, №№ 59, 60, 72, 79:

³ Նույն տեղում, № 72, տող 1—4:

⁴ Նույն տեղում, №№ 59, 60, 61:

⁵ Նույն տեղում, № 59, տող 1—7:

⁶ Նույն տեղում, № 60, տող 5—8:

⁷ Նույն տեղում, տող 9—13:

⁸ Б. Б. Пиотровский, Ванское царство (Урарту), М., 1959, стр. 140; Н. В. Арутюнян, Земледелие и скотоводство Урарту, 1964, стр. 43—44; Նույնի՝ Бианили (Урарту), Ереван, 1970, стр. 388—389.

բավ-արևմուտք ընկած հատվածից⁹: Մակայն նկատի ունենալով այն հանգամանքը, որ Մինուան իր անվամբ կոչում էր միայն նշանավոր կառույցները, ինչպիսին էր, ասենք, 80 կմ հեռավորությունից բերված ջրանցքը¹⁰, որը ոռոգում էր Տուշպա մայրաքաղաքի ու շրջակա հողերը, ապա կարելի է կարծել, որ Ադա և Խոտանլու գյուղերից գտնված հիշյալ արձանագրությունները վկայում են միևնույն ջրանցքի կառուցման մասին:

Եթե ջրանցքը անց է կացվել Մենեզայա—Մանազկերտի քաղաքից, ինչպես պարզ կերպով ասվում է Խոտանլուի արձանագրության մեջ և հասել է մինչև Խոտանլու գյուղը, ապա ջրանցքը մինչև Արածանի գետը թափվելը դեռևս պետք է հոսեր Խոտանլուի և Արածանի գետի միջև գտնվող հարևան Ադա գյուղի մոտով և նոր թափվեր Արածանի գետը:

Հետաքրքիր է նաև, թե որտեղից է սկիզբ առել այս ջրանցքը: Քանի որ այն անց է կացվել Մենեզայա—Մանազկերտից, ուստի սկիզբը պետք է փնտրել քաղաքի շրջակայքում: Մանազկերտ քաղաքը գտնվում է Արածանի գետի և նրա ձախափնյա վտակ Բանսանի միախառնման տեղում: Ուստի վերոհիշյալ ջրանցքը կարող է անցկացվել այդ երկու ջրային աղբյուրներից: Ջրանցքը Մանազկերտ քաղաքի հարավ-արևմտյան մասից անցկացված լինել չէր կարող, ինչպես դա ենթադրվում է, որովհետև Արածանի գետի այդ մասը Մենեզայա—Մանազկերտից հոսանքով գեպի ցած է գտնվում: Հնարավոր է, որ Մարմոս գյուղում (որը գտնվում է Մանազկերտի մոտ, նրանից հյուսիս-արևմուտք, Բանսան վտակի ափին) գտնված Մինուայի արձանագրության մեջ հիշատակված ջրանցքը սրա սկզբնական մասն է կազմել: Ամենայն հավանականությամբ այս ջրանցքը ևս Մինուայի անվամբ է կոչվել, որովհետև շնայած պահպանվել է արձանագրության միայն անեծքի բանաձևը, ուղղված արձանագրությունը փշաջնողին և կամ էլ ջրանցքի կառուցումը ուրիշ մեկին վերագրողին¹², սակայն այդքանն էլ բավական է պատկերացում կազմելու, որ այս արձանագրությունը կարևոր ջրանցքաշինական կառույցի մասին է վկայում: Ինչպես ցույց է տալիս ջրանցքաշինության վերաբերյալ Մինուայի արձանագրությունների վերլուծությունը, նման անեծքի բանաձև ունեն միայն այն արձանագրությունները, որտեղ ջրանցքը կոչված է Մինուայի անվամբ¹³:

Այսպիսով, եթե ընդունելի համարենք, որ երեք արձանագրություններն էլ միևնույն ջրանցքի կառուցման մասին են վկայում, ապա կարող ենք ասել, որ սա բավականին խոշոր ջրանցքաշինական կառույց է եղել և իր շափերով (ունեցել է գրեթե 30 կմ երկարություն) հավանաբար զիջել է միայն Տուշպա մայրաքաղաքի համար կառուցված Մինուայի նշանավոր ջրանցքին: Մարմոս գյուղի մոտ սկիզբ առնելով այս ջրանցքը հոսել է դեպի հարավ-արևմուտք և անցնելով Մենեզայա—Մանազկերտ քաղաքի տարածքով, հասել մինչև Խոտանլու և Ադա գյուղերը ու թափվել Արածանի գետը, իր ճանապարհին, ըստ արձանագրությունների, շենացնելով յոթ բնակավայր իրենց շրջակայքով:

⁹ Н. В. Арутюнян, Бианили (Урарту), стр. 388—389.

¹⁰ Н. В. Арутюнян, Земледелие и скотоводство Урарту, стр. 19.

¹¹ О. О. Карагезян, Локализация урартского царского города Арцашк, ЗУУՀ ԳԱ «Արաբեր» (հաս. գիտ.), 1976, № 5, էջ 69.

¹² УКН, № 61.

¹³ Նույն տեղում, №№ 43, 44, 45:

Ավարտելով այս հսկայական ջրանցքի կառուցումը, Մինուան այնուհետև ձեռնամուխ է լինում տնտեսական խօշոր մի կենտրոնի կառուցման աշխատանքներին, որը Մանազկերտի շրջանում պետք է կատարեր նույն դերը, ինչ հետագայում կառուցված Թեյշեբախենն Արարատյան դաշտավայրում:

Մարմոս գյուղի հարևանությամբ գտնվող Բոստանկայա գյուղից գտնված արձանագրության մեջ ասվում է. «Խալդյան զորությամբ Մինուա Իշպուհինորդին այս գինու մառանը կառուցեց: 900 ակարկի (կա) արևտեղ: Ամրոց կառուցեց հոյակապ...»¹⁴: Գինու այս հսկայական մառանները իրենց տարողությամբ զիջել են միայն Թեյշեբախենի գինու մառաններին¹⁵, որը սակայն կառուցվել է գրեթե 100 տարի հետո:

Մենեղայա-Մանազկերտ քաղաքն ու Բոստանկայայի արձանագրության մեջ հիշատակված ամրոցը իր հսկայական գինու մառաններով Արածանի գետի վերին հոսանքներում նույն դերն են խաղացել, ինչ էրեբունեն և Թեյշեբախենն Արարատյան դաշտավայրում: Երկու դեպքում էլ առաջինները եղել են ուսումնական կենտրոններ, իսկ վերջինները՝ վարչատնտեսական:

Մենեղայա-Մանազկերտ շրջանում տնտեսության զարգացման նպատակով ոռոգման աշխատանքները շարունակել է Մինուայի որդին և հաջորդը՝ Արգիշթե I-ը (մ. թ. ա. 786—764 թթ.): Նա մտահոգվել է Մանազկերտի դիմաց՝ Արածանիի աջ ափին գտնվող շրջանները ոռոգելի դարձնելու աշխատանքով: Այդ մասին միակ գրավոր տեղեկությունը պահպանվել է Արգիշթե I-ի հորխոռույան տարեգրության մեջ, ուր խոսվում է դեպի Տուարածյան դաշտ Դախնայաթինն գետից ջրանցք անցկացնելու մասին¹⁶: Տուարածյան դաշտը սովորաբար նույնացվում է միջնադարյան հայկական Տուարածատափի հետ, որը գտնվում է Մանազկերտի դիմաց, Արածանիի աջ ափին: Դախնայաթինն գետը, որից անց է կացվել այս ջրանցքը, հավանաբար Արածանի գետն է եղել¹⁷, կամ էլ այդ շրջանում նրան սնուցող վտակներից մեկը: Միայն այն փաստը, որ Արգիշթե I-ը հորխոռույան տարեգրության մեջ իր բազմաթիվ արշավանքների հետ միասին հիշատակել է նաև այս ջրանցքի կառուցումը, կարելի է եզրակացնել, թե ինչպիսի մեծ նշանակություն է տվել նա այդ աշխատանքներին:

Ահա հիմնական այն գրավոր աղբյուրները, որոնք վկայում են ուրարտական ժամանակաշրջանում Մանազկերտի շրջանում կատարված ջրանցքաշինության մասին:

Վերոհիշյալ երկու ջրանցքները, կառուցված Մինուա և Արգիշթե I թագավորների կողմից, հանդիսացան Մենեղայա-Մանազկերտի շրջանի տնտեսական կյանքի հիմնական աղբյուրները, որտեղ այդ ժամանակներից սկսած բուռն կերպով զարգացավ գյուղատնտեսությունը և շարունակվեց գրեթե մինչև մեր օրերը: Տնտեսության զարգացումը ինչպես երկրի կենտրոնական, այնպես էլ ծայրամասային շրջաններում ամուր հիմք հանդիսացավ ուրարտական պետության հետագա հզորության համար, որը և հանգեցրեց այն բանին, որ

¹⁴ Նույն տեղում, № 79:

¹⁵ Б. Б. Пиотровский, Кармир-Блур, 2, Ереван, 1952, стр. 74.

¹⁶ УКИ, № 127, տող 12—13:

¹⁷ Н. В. Арутюнян, Земледелие и скотоводство Урарту, стр. 39. 2. 2. 4-րդ գլուխը. Սեպտեմբերի աղբյուրների Այիա քաղաքը, ՀՍՍՀ ԳԱ «Լրագրեր» (Նաս. դիտ.), 1975, № 4, էջ 90.

արդեն Մինուայի և Արգիշթե I-ի թագավորության շրջանում Քրարտուն հազ-
թող դուրս եկավ Առաջավոր Ասիայում առաջնակարգ դիրքեր գրավելու համար
Ասորեստանի դեմ մղված երկարատև ու համառ պայքարում և այն առաջնու-
թյունը, հաղվադոպ բացառություններով, չգիջեց իր գոյության ողջ ընթաց-
քում:

УРАРТСКОЕ ИРРИГАЦИОННОЕ СТРОИТЕЛЬСТВО В МАНАЗКЕРТСКОМ РАЙОНЕ

В. А. ГАЙСЕРЯН

(Резюме)

Из клинописных надписей, найденных в селах Ада, Хотанлу и Мар-
мос Маназкертского района, известно, что царь Минуа (810—786 гг. до
н. э.) построил ирригационный канал длиной почти в 30 км, который
стал основным источником хозяйственной жизни района. По своей ве-
личине этот канал уступает только каналу того же царя Минуа, снаб-
жавшему водой столицу государства Тушпа-Вая. После царя Минуа в
Маназкертском районе ирригационным строительством занимался его
сын Аргиште I (786—764 гг. до н. э.), который с правого берега реки
Даннала (Арацани) провел канал для Турацийской долины. Об этом
свидетельствует знаменитая Хорхорская летопись Аргиште I.